



15.03.17

EM2017/ 79

Matumuuna Inatsisartut suleriaasianni § 33 naapertorlugu Inatsisartut aalajangiiffigisassaattut siunnersuut saqqummiunneqarpoq:

Inatsisartut aalajangiiffigisassaattut siunnersuutigineqarpoq, Naalakkersuisut ukioq 2017 naatinnagu kaajallaasitamik nutaamik atulersitsissasut pisortat pisiortortarnerat pillugu, tassanilu aamma kiffartuussinerit ilanngullugit naleqqussarneqarnissaa, siunertaralugu neqerooruteqartitsisarnermut inatsisissamut tunngavissiiinissaq eqqarsaatigalugu, soorlu tamanna Inatsisartut UPA2015/118-imi akuersarneqarneratigut pisussanngortinneqartoq.

(Inatsisartunut ilaasortaq Mala Høy Kuko, Atassut)

Tunngavilersuut

Kalaallit inuiaqatigiinni aningaasarsiornikkut unammilligassat eqqarsaatigalugit, inissisimaffik pingaarutilimmiippugut, tassanilu piffissaagallartillugu aningaasaatinik atuinissaq qajassuussilluni ingerlanneqartariaqarpoq. Suli pisariaqarpoq pitsaasumik aningaasaqarnikkut aqutseriaatsip sumiiffinni tamani atuutsinneqarnissaa. Taamaaliortariaqarneq minnerunngitsumik Namminersorlutik Oqartussat iluanni atugassianut assigiinngitsunut atorluannissaq aammalu aningaasartuutikillisaanissamik isiginninniarnissaq, periarfissaqartillugu aammalu naleqqukkaagat. Atassut isumaqarpoq taamatut aqqissuusinnissami pisariaqarluinnartoq Namminersorlutik Oqartussat atuineranut aammalu kiffartuussinernik pisisarnerinut erseqqissunik aammalu qanoq iliornissamut malittarisassaqaarnissaa, taakkumi sakkugineqarsinnaammata pitsaasumik qulakkeerinnillu aamma ineriartortitsinissaq.

UPA2015/118¹-mi Inatsisartunit aalajangiunneqarpoq Naalakkersuisut neqeroortitsisarnermut inatsisiliussasut. Naalakkersuisut oqariartuutigeerpaat kissaatigalugu pisortat pisiortortarneranut

¹ Taamani aalangiiffigisassatut siunnersuut ima oqaasertaqarsimavoq: Naalakkersuisut pisortat pisiortortarneranni inatsisitigut, teknikkut aammalu niuernerpalaarneq eqqarsaatigalugu neqeroortitsinermi atorneqartartussamik inatsisissatut siunnersuummik saqqummiussinnissamut pisussaaffilerneqarnissaannik Inatsisartut aalajangiussassaattut siunnersuut. Inatsisissatut siunnersuutitip qulakkiissavaa pisiffigisat assigiimmik pineqarnissaat, neqerooruteqartitsinermi pisiffissat toqqarneqarneranni sinaakkutissat ersarissuunissaat aammalu neqerooruteqartoqartillugu maalaaruteqarfiusinnaasumik pilersitsisoqarnissaa. Inatsisissatut siunnersuummi aamma pisiffissat toqqarneqarneranni inuiaqatigiit aningaasaqarnerat tamakkiinerusumik qanoq isiginiarneqartassanersut pillugit maleruagassiortoqarnissaa ilaatinneqassaaq.



aamma neqeroortitsisarnermut atatillugu inatsisissatut siunnersuusiorusullutik. Naalakkersuisut tassunga atatillugu Naalakkersuisut ilisimatitsissutigivaat, siullertut neqeroortarneq aamma pisiortortarneq pillugu kaajallaasitamik suliaqaqqaarumallutik, tassuunakkut misilittagaqalernissaq qulakkeeqqaarumallugu inatsisiliornissamut tunngavissiisinnaasut.

Kaajallaasitat pineqartut suli saqqummersinneqarsimangillat, tamanna Naalakkersuisut § 37 atorlugu apeqqummut nr. 160-mut (2016) akissuteqarnermini ilisimatitsissutigivaat. Tulluanngilaaq taamatut suli kaajallaasitat saqqummersinneqarsimangimmata, pingaartumik kingusinnerusukkut neqeroortarnermut inatsisiliornissamut tunngavissiisussaammata. Taamaattumiguna maannakkut siunnersuutigigippat Naalakkersuisut suliap 2017-imi naammassineqarnissaanik peqquneqassasut. Kaajallaasitat naliginnaasumik Naalakkersuisuni allaffissornerup iluani suliassaannaagaluarput, maannali suliaq allaanerumumik inissisimavoq. Naalakkersuisummi neriorsuutigivaat kaajallaasitat misilittagaqarnissamut tunngavissatut atorneqarnissaat Inatsisartunit aalajangiunneqarsimasoq pingaartinneqarluni UPA2015/118.²

Naalakkersuisut namminneq kaajallaasitaliorusunneratigut politikikkut kissaatigisat aammalu Inatsisartunit siunertarineqartunut UPA2015/118³-imi naaperiaaneratut paasineqarsinnaavoq. Taamaattumik Atassut-mit pissusissamisoorsorivarput matumani aalajangiiffigisassatut siunnersuutip saqqummiunneqarnissaa, taamaasiornikkut Inatsisartut qulakkeerinnissapput suliap ingerlanneqarnissaa aammalu misilittakkanik pissarsisinnaanngussallutik, kingusinnerusukkut neqeroortarnermut inatsisiliornissamut tunngavigineqassammata, Inatsisartut kissaatigisaattut.

Atassummi isumaqangilagut, arlaannaatigulluunniit Inatsisartunut iluaqutaassasoq, siunnersuutit saqqummiuteqqittaarnissaannik aammalu § 37 atorlugu apeqquteqaqattaarnissamut innersuunneqaqattaarnissaq, Inatsisartummi aalajangereerput, maannakkullu Naalakkersuisut

² http://www.inatsisartut.gl/dvd/FM2015/pdf/media/2562593/pkt118_fm2015_bf33_indkoekslov_bet_2beh_kal.pdf

³ Naalakkersuisut ima imm. 118-mut akissuteqarnermini ilaatigut oqaaseqarput:

”Naalakkersuisut siunnersuuteqartoq matumuuna isumaqatigaat, piffissaq ungasinnerulaartoq isigalugu Kalaallit Nunaat neqerooruteqartarneq pillugu inatsiseqartariartoq. Siullermik Naa-lakkersuisut isumaqarput naleqqunnerpaajusoq pisiortorneq pillugu kaajallaasitap atuuttup iluarsaannissaanut pisiortornermut tunngasunut isumalluutit tullerriarneqarpata. Iluarsaassineq suliassaavoq isumalluutit atuinikiffiunerusoq, pitsaasumik sukkasuumillu sunniuteqarsinnaasoq.”

http://www.inatsisartut.gl/dvd/FM2015/pdf/media/2562171/pkt118_fm2015_bf33_indkoekslov_sn_1beh_kal.pdf



pisussaaffigaat Inatsisartut siusinnerusukkut neqeroortitsinermut inatsisiliortoqarnissaannik aalajangersimasaata timitalerniarneqarnissaanut, tassalu Naalakkersuisut kaajallaasitamik nutaamik atulersitsissallutik, matumani siunnersuummi eqqartorneqartut.

Pisortat aningaasatigut allaffissornikkullu kingunerisassa:

Naatsorsuutigineqarpoq pisiortortarnermi kaajallaasitaliorneq UPA2015-mi ingerlanneqareersimassasoq. Taamaattoqarnissaa naatsorsuutigalugu annertunerusumik 2017-imi kaajallaasitap naammassiniarneqarnissaanut atatillugu Namminersorlutik Oqartussat allaffissorneranut aningaasartuutaanerugaarnaviangilaq. Naatsorsuutigineqarpoq matumani aalajangiiffigisassatut siunnersuutip annerpaamik ukiumut sulinermi atugassarititat sisamararterutaattut annertussusilimmik 125.000 kr. missaanni akeqarnissaa.

Namminersorlutik inuussutissarsiuuteqartunut aningaasatigut allaffissornikkullu kingunerisassa:

Soqanngilaq

Innuttaasunut aningaasatigut allaffissornikkullu kingunerisassa:

Soqanngilaq